

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB SIVAKUMAR VARATHARAJU NAIDU
[BATU GAJAH]**

TARIKH : 2 DISEMBER 2020 (RABU)

SOALAN

YB SIVAKUMAR VARATHARAJU NAIDU [BATU GAJAH] minta **MENTERI PELANCONGAN, SENI DAN BUDAYA** menyatakan kerugian yang dialami oleh sektor pelancongan akibat penularan COVID-19. Sebelum ini, sektor pelancongan menyumbang lebih kurang 15% GDP negara. Berapa jumlah hotel yang telah gulung tikar dan apakah tindakan Kementerian untuk membantu industri perhotelan yang amat terjejas kerana pandemik ini.

JAWAPAN

Tuan Yang di-Pertua,

1. Berdasarkan maklumat yang diperolehi daripada Suruhanjaya Syarikat Malaysia (SSM), statistik entiti perniagaan perhotelan yang telah menamatkan perniagaan dalam tempoh bulan Mac hingga Oktober 2020 adalah seperti di bawah. Data ini tidak memaklumkan alasan penamatan perniagaan dan juga maklumat lain seperti tarikh mula kes penggulungan difailkan di mahkamah.

- (i) Sebanyak 77 buah syarikat dengan kod 55101 hingga 55109 iaitu *hotels and resort hotels, motels, apartment hotels, chalets, rest house/guest house, bed and breakfast units, hostels, home stay and other short term accomodation activities* telah menamatkan perniagaan. Manakala penggulungan oleh mahkamah dan penggulungan secara sukarela untuk syarikat dengan kod yang sama adalah sebanyak 32 buah syarikat;
- (ii) Manakala penggulungan oleh mahkamah dan penggulungan secara sukarela untuk syarikat dengan kod yang sama adalah sebanyak 32 buah syarikat.

2. Penularan wabak COVID-19 telah membawa kesan negatif yang sangat besar bukan sahaja kepada industri pelancongan tempatan malah turut menjejaskan industri ini di seluruh dunia. Susulan penularan pandemik ini, Kementerian Pelancongan, Seni dan Budaya (MOTAC) menganggarkan industri pelancongan tempatan mengalami kerugian melebihi RM100 bilion bagi tahun 2020 akibat kehilangan perbelanjaan pelancong terutamanya yang berkaitan dengan penginapan, pengangkutan, membeli-belah, makanan dan minuman.

NO. SOALAN : 21

3. Sepertimana Ahli Yang Berhormat sedia maklum, Kerajaan telah mengumumkan beberapa pakej rangsangan ekonomi (PRE) seperti PRIHATIN, PRIHATIN PKS TAMBAHAN dan PENJANA. Inisiatif ini adalah untuk membantu meringankan beban rakyat dan kelangsungan perniagaan. Ia turut boleh dimanfaatkan oleh penggiat industri pelancongan dan seterusnya memulihkan industri ini. Antara bantuan dan insentif yang disediakan adalah:

- (i) Skim Pembiayaan Pelancongan PENJANA bagi PKS sektor pelancongan (*PENJANA Tourism Funding – PTF*);
- (ii) pengecualian cukai pelancongan sepenuhnya bagi tempoh mulai 1 Julai 2020 hingga 30 Jun 2021;
- (iii) pengecualian cukai perkhidmatan ke atas perkhidmatan penginapan mulai 1 September 2020 hingga 30 Jun 2021;
- (iv) memperkenalkan *Employment Retention Programme* (ERP), iaitu bantuan segera (*immediate financial assistance*) sebanyak RM600 sebulan kepada majikan bagi setiap pekerja yang diminta bercuti tanpa gaji (CTG) akibat penularan COVID-19;
- (v) penyambungan Program Subsidi Upah (PSU) untuk 3 bulan tambahan bagi majikan sedia ada yang sedang menerima PSU dan bantuan PSU selama 6 bulan bagi semua permohonan baru mulai 1 Oktober 2020 hingga 31 Disember 2020;
- (vi) inisiatif bantuan Perusahaan Kecil dan Sederhana (PKS) seperti Skim Pembiayaan PKS PENJANA dan Geran Padanan Pendigitalan PKS;
- (vii) potongan cukai untuk perbelanjaan berkaitan COVID-19 seperti pembelian PPE/ pengimbas suhu dan kos ujian saringan; dan

NO. SOALAN : 21

(viii) penawaran penangguhan atau moratorium bayaran pinjaman bersasar yang telah dilanjutkan sehingga 31 Disember 2020, atau 2021 bergantung kepada institusi kewangan masing-masing.

4. Kerajaan juga telah mengumumkan pelanjutan pelepasan cukai pendapatan individu sehingga RM1,000 ke atas perbelanjaan melancong dalam negara sehingga 31 Disember 2021 bagi merancakkan pelancongan domestik negara.

5. Pada masa yang sama, MOTAC turut menyediakan kemudahan pembiayaan seperti Tabung Infrastruktur Pelancongan (TIP) menerusi Bank Pembangunan Malaysia Berhad (BPMB) dan Tabung Khas Pelancongan (TKP) yang diuruskan oleh Bank Perusahaan Kecil dan Sederhana Malaysia Berhad (SME Bank) bagi membantu pengusaha pelancongan untuk membangunkan dan mengembangkan produk dan projek pelancongan. Inisiatif ini boleh membantu penggiat industri pelancongan dan yang berkaitan untuk terus mampan dan berdaya tahan, lebih-lebih lagi dalam tempoh pandemik ini.

6. MOTAC turut giat meneliti pelbagai cara kreatif untuk membantu industri pelancongan negara bangkit semula. Baru-baru ini telah dilancarkan bantuan bersasar dalam bentuk rebat/diskaun atau subsidi pakej pelancongan melalui platform dalam talian, serta kerjasama dengan persatuan pelancongan tempatan, taman tema, persatuan Homestay dan membeli belah bagi menawarkan pakej pelancongan yang menarik kepada rakyat.

Sekian, terima kasih.